

**NIKAH MIS-YAR :  
SATU KAJIAN TERHADAP KONSEP DAN PERSEPSI TOKOH  
MASYARAKAT ISLAM DI MALAYSIA**

Oleh

**ASMA' BINTI YUSOFF**

**Tesis yang diserahkan untuk  
memenuhi keperluan bagi Ijazah Sarjana Sastera (Syariah)**

**April 2012**

## PENGHARGAAN

بِسْمِ اللَّهِ الرَّحْمَنِ الرَّحِيمِ

Syukur ke hadrat Allah s.w.t. kerana dengan izinNya penulisan tesis ini akhirnya dapat disiapkan. Dalam tempoh berkenaan penulis telah memperolehi ilmu, pengetahuan serta kefahaman dan keyakinan. Doa dipanjatkan agar sepanjang tempoh berkenaan, dianugerah oleh Allah kepada penulis, *barakah*, *rahmah* serta *ināyah*. Semoga hasilnya dapat menjadi ilmu yang dapat dimanfaatkan pada masa akan datang.

Dalam menyempurnakan tugas ini segala sokongan dan bantuan dari semua pihak dan individu amat dihargai.

Setinggi-tinggi penghargaan dirakamkan kepada satu-satunya penyelia tesis ini *Sāhib al-Fadhilah*, Dr. Atiqullah b. Abdullah atas kesabaran dan kegigihan beliau dalam menyelia, memberi teguran membina, lontaran idea, memberi semangat serta membetulkan kesilapan-kesilapan sepanjang tempoh tersebut. Semoga beliau dilimpahi *rahmah* dan kasih sayang Allah s.w.t. sepanjang hayat beliau di dunia dan akhirat.

Ucapan penghargaan juga ditujukan kepada Kementerian Pelajaran Malaysia di atas kelulusan dan pembiayaan sepanjang menjadi pelajar sepenuh masa.

Penghargaan juga ditujukan kepada Dekan dan kakitangan Pusat Pengajian Ilmu Kemanusiaan, penyelaras dan para pensyarah Bahagian Pengajian Islam, Dekan dan kakitangan Institut Pengajian Siswazah (IPS), Perpustakaan Universiti Sains Malaysia (USM), Pulau Pinang atas peluang dan bantuan yang diberikan sepanjang pengajian ini.

Setinggi penghargaan dan terima kasih tidak dilupakan kepada kakitangan Jabatan Mufti Kerajaan Negeri Kedah, Jabatan Mufti Kerajaan Negeri Pulau Pinang dan Jabatan Mufti Kerajaan Negeri Perlis atas bantuan dan kerjasama mengatur pertemuan untuk temubual dengan *al-Sāhib al-Samāhah* Mufti.

Setinggi penghargaan juga dirakamkan kepada semua responden yang terdiri daripada *al-Sāhib al-Samāhah*, Datuk Hassan b Hj Ahmad, Mufti Kerajaan Negeri Pulau Pinang, *al-Sāhib al-Samāhah*, Datuk Hasbullah b Abd Halim, Mufti Kerajaan Negeri Kedah dan *Sāhib al-Samāhah*, Dr Mohd Asri b Zainul Abidin mantan Mufti Kerajaan Negeri Perlis yang mewakili ahli agama, Prof. Madya Datuk Dr Mahmood Zuhdi b. Abd Majid, pensyarah Universiti Islam Antarabangsa Malaysia (UIAM), Prof. Madya Dr Najibah Mohd Zain, Timbalan Dekan Hal Ehwal Pelajar, Fakulti Undang-undang, Universiti Islam Antarabangsa Malaysia (UIAM) dan Dr Hasanah Abd Khafizd, pensyarah Universiti Sains Malaysia (USM) yang mewakili Ahli Akademik, Prof Madya Dr Halina Halijah bt Siraj, pensyarah Universiti Kebangsaan Malaysia (UKM) merangkap Presiden Jamaah Islah Malaysia (JIM), Dr Rubiah Kulop Hamzah, Presiden International Muslim Women Union (IMWU)-Malaysia dan Encik Musa b Awang, Setiausaha Majlis Peguam Syarei Malaysia yang mewakili NGO.

Tidak ketinggalan ucapan penghargaan kepada pihak Perpustakaan Tun Seri Lanang, Univeriti Kebangsaan Malaysia (UKM), Perpustakaan Institut Jaamiaah Islamiyah Negeri Kedah (INSANIYAH), Perpustakaan Awam Alor Setar Kedah dan Perpustakaan Awam Jitra, Kedah.

Akhirnya ucapan penghargaan yang setulusnya kepada Allahyarham Bonda tercinta (kembali ke rahmatullah pada 28 April 2009 yang sempat mengetahui, melihat, mendoakan dan memberikan semangat dan sokongan menyambung pelajaran di USM – al-Fatihah), suami, anak-anak, kaum keluarga dan sahabat-sahabat seperjuangan yang tidak jemu-jemu mengharapkan pengajian ini dapat disempurnakan.

Semoga segala usaha dirahmati Allah s.w.t. Amin.

Asma' binti Yusoff  
Institut Pengajian Siswazah  
Universiti Sains Malaysia  
Pulau Pinang

# KANDUNGAN

Penghargaan.....	ii
Kandungan.....	iv
Senarai kependekan.....	vii
Jadual Transliterasi.....	viii
Statut.....	ix
Abstrak.....	x
<i>Abstract</i> .....	xi
<b>BAB 1 PENGENALAN</b>	
1.0 Muqaddimah.....	1
1.1 Latar Belakang Kajian.....	1
1.2 Penyataan Masalah.....	6
1.3 Batasan Kajian.....	8
1.4 Kepentingan Kajian.....	9
1.5 Objektif Kajian.....	10
1.6 Kajian Lepas.....	10
1.7 Metodologi Kajian.....	15
<b>BAB 2 FALSAFAH DAN HUKUM HAKAM PERKAHWINAN DALAM ISLAM</b>	
2.0 Pendahuluan.....	18
2.1 Takrif Nikah.....	19
2.2 Falsafah Perkahwinan Dalam Islam.....	21
2.3 Tujuan dan Hikmah Perkahwinan.....	23
2.4 Jenis-jenis Perkahwinan.....	30
2.4.1 Kahwin <i>Mut'ah</i> .....	30
2.4.2 Kahwin <i>Sighār</i> .....	32
2.4.3 Kahwin <i>Muhallil</i> .....	34
2.4.4 Kahwin Sementara.....	35
2.4.5 Nikah Gantung.....	37
2.4.6 Nikah Sindiket.....	38
2.5 Hukum-hukum Perkahwinan.....	39
2.5.1 Harus.....	40
2.5.2 Sunat.....	41
2.5.3. Wajib.....	43
2.5.4 Makruh.....	44
2.5.5 Haram.....	45
2.6 Bentuk-bentuk Pemberian Yang Diwajibkan Ke Atas Suami.....	48
2.6.1 Mahar.....	49
2.6.2 Nafkah.....	50
2.6.2.1 Nafkah Disebabkan Perkahwinan.....	52
2.6.2.2 Nafkah Disebabkan Hubungan Keturunan.....	53

2.6.3 Mut'ah.....	53
2.7 Peranan Suami dan Isteri.....	55
2.7.1 Tanggungjawab Suami.....	56
2.7.1.1 Tanggungjawab Suami Sebagai Pemimpin Dalam Rumahtangga.....	56
2.7.1.2 Tanggungjawab Memberikan Nafkah.....	57
2.7.1.3 Tanggungjawab Terhadap Pendidikan...	59
2.7.1.4 Tanggungjawab Sebagai Tempat Berlindung.....	60
2.7.2 Tugas dan Tanggungjawab Isteri.....	61
2.7.2.1 Menjaga Pergaulan.....	61
2.7.2.2 Menjaga Kehormatan Diri dan Suami.....	62
2.7.2.3 Menjaga Hartabenda Suami.....	63
2.7.2.4 Taat Kepada Suami.....	63
2.7.2.5 Menguruskan Rumahtangga.....	64
2.7.2.6 Mendidik Anak-anak.....	64
2.8 Peranan Institusi Kekeluargaan Dalam Islam.....	66
2.9 Kesimpulan.....	77

### **BAB 3 KONSEP NIKAH MIS-YAR DAN KEDUDUKANNYA DALAM ISLAM**

3.0 Pendahuluan.....	79
3.1 Takrif Nikah Mis-yar.....	80
3.2 Asal usul Nikah Mis-yar dan Sejarahnya.....	84
3.3 Hukum Nikah Mis-yar.....	91
3.3.1 Harus Tetapi Makruh Dalam Keadaan-keadaan Tertentu.....	99
3.3.1.1 Hujah Hukum Harus Tetapi Makruh	
a. Cukup Syarat dan Rukun.....	101
b. Hadis Nabi.....	102
c. Ada Kebaikan.....	103
3.3.2 Haram.....	103
3.3.2.1 Hujah Kepada Hukum Haram	
a. Penafian Maqasid Syar'ei.....	105
b. Cara Perkahwinan Ini Bersalahan Dengan Cara Perkahwinan Yang Dibawa Oleh Islam.....	105
c. Syarat Menyalahi Tujuan Akad.....	105
d. Membuka Pintu-pintu Kerosakan Dan Kemusnahan.....	106
e. Lelaki Mengambil Kesempatan.....	107
f. Tanggungjawab Terabai.....	107
g. Syarat Tiada Nafkah Dan Bermalam	107
3.3.3 Golongan Berkecuali (Tawaqquf).....	108
3.4 Pandangan Yang <i>Rājih</i> (Kuat) Tentang Nikah Mis-yar	108
3.5 Kedudukan Nikah Mis-yar Dalam Undang-undang Keluarga Islam Di Malaysia.....	116

3.6 Kesimpulan.....	127
<b>BAB 4 PERSEPSI TOKOH MASYARAKAT ISLAM DI MALAYSIA</b>	
4.0 Pendahuluan.....	129
4.1 Konsep Dan Falsafah.....	130
4.2 Nafkah.....	136
4.3 Hukum.....	142
4.4 Hak Bermalam.....	145
4.5 Mis-yar Sebagai Medium Penyelesaian Masalah Sosial Dalam Masyarakat.....	147
4.6 Implikasi.....	152
4.7 Kemungkinan Pelaksanaannya Di Malaysia.....	160
4.8 Realiti Masyarakat Di Malaysia.....	163
4.9 Analisis.....	165
4.10 Kesimpulan.....	171
<b>BAB 5 PENEMUAN KAJIAN</b>	
5.0 Pendahuluan.....	173
5.1 Penemuan Kajian.....	173
5.2 Kesimpulan.....	180
<b>BAB 6 PENUTUP</b>	
6.0 Cadangan Kajian Ilmiah Pada Masa Hadapan.....	181
6.1 Penutup.....	182
<b>BIBLIOGRAFI.....</b>	185
<b>LAMPIRAN-LAMPIRAN TRANSKRIPSI.....</b>	A.....H

## JADUAL TRANSLITERASI

Bacaan	Huruf ‘Arāb	Transliterasi
Alif	ا	-
bā’	ب	b
tā’	ت	t
thā’	ث	th
jīm	ج	j
hā	ح	h
khā	خ	kha
dāl	د	d
dhāl	ذ	dh
rā’	ر	r
zay	ز	z
sīn	س	s
syīn	ش	sy
sād	ص	s
dād	ض	d
tā	ط	t
zā	ظ	z
‘ayn	ع	‘
ghayn	غ	gh
fā	ف	f
qāf	ق	q
kāf	ك	k
lām	ل	l
mīm	م	m
nūn	ن	n
wāw	و	w
hā	ه	h
hamzat	ء	a/a’
yā	ي	y
ta marbutat	ة	t

### Vokal

Dalam system vocal ‘Arab ada vokal pendek, ada vokal panjang dan ada diftong:

1. Pendek

\_\_\_\_\_a  
 \_\_\_\_\_i  
 \_\_\_\_\_u

2. Panjang

ا \_\_\_\_\_ā  
 ي \_\_\_\_\_ī  
 و \_\_\_\_\_ū

3. Diftong

اي \_\_\_\_\_ay  
 او \_\_\_\_\_aw

Berdasarkan Pedoman Transliterasi Huruf ‘Arab ke Huruf Rumi, terbitan Dewan Bahasa dan Pustaka, Kuala Lumpur, cetakan 1988.

**NIKAH MISYAR :  
SATU KAJIAN TERHADAP KONSEP DAN PERSEPSI TOKOH MASYARAKAT  
ISLAM DI MALAYSIA**

**ABSTRAK**

Realitinya bilangan golongan wanita yang belum berkahwin yang lanjut usia dan golongan ibu tunggal merupakan satu fenomena sosial yang semakin ketara di negara ini. Ini antara punca timbulnya isu nikah mis-yar. Oleh kerana nikah mis-yar merupakan satu istilah yang boleh dikatakan baru, apabila muncul di tengah-tengah masyarakat Islam di Malaysia, ia mendapat pelbagai reaksi dari pelbagai pihak di kalangan masyarakat Islam. Sebahagian pandangan yang dikemukakan oleh sesetengah pihak lebih berasaskan sentimen dan kejahilan terhadap konsep dan kedudukan nikah mis-yar menurut Fiqh Islam. Kajian ini dibuat untuk membincangkan tentang konsep nikah mis-yar dan kedudukannya menurut pandangan para Fuqaha' Islam. Selain itu, oleh kerana nikah mis-yar telah menjadi isu dan perbincangan di negara ini, maka kajian ini juga akan turut melihat persepsi masyarakat Malaysia tentang isu ini. Untuk mencapai tujuan ini, kajian mengenai nikah mis-yar ini dibuat dengan meninjau pandangan para fuqaha' serta sarjana Islam semasa selain merujuk kitab-kitab karangan ulama tradisional. Perbandingan juga dibuat dengan pernikahan yang biasa diamalkan supaya jelas apakah konsep nikah mis-yar ini menepati kehendak konsep dan falsafah perkahwinan dalam Islam seperti yang diajar oleh Rasulullah s.a.w. menerusi hadis-hadis baginda serta rujukan yang utama dalam perundangan Islam iaitu al-Quran. Untuk memahami persepsi masyarakat Islam terhadap nikah mis-yar ini, satu kajian lapangan telah dibuat dengan memilih tokoh-tokoh yang boleh mewakili pelbagai golongan masyarakat Malaysia yang mampu memberi pandangan dari pelbagai bidang. Daripada data yang dianalisis secara kualitatif, jelas sekali bahawa pengetahuan masyarakat Islam terhadap nikah mis-yar ini amat sedikit dan kurang diberikan perhatian oleh semua pihak. Kajian ini mendapati bahawa nikah mis-yar ini agak menarik dan tidak ada salahnya untuk diamalkan bagi para isteri yang ingin membantu sesama kaum wanita yang belum berkahwin dan golongan janda.

**MIS-YAR MARRIAGE:  
A RESEARCH ON THE CONCEPT AND PERCEPTION OF ISLAMIC SOCIETY  
FIGURES IN MALAYSIA**

**ABSTRACT**

In reality the number of overage unmarried women and single mothers has become a critical social phenomena in the country. This triggers the issue of Mis-yar marriage in Malaysia. Since this notion is at its infant newly emerges in the center of Islamic society in Malaysia, it has received numerous reactions from various parties. Some of the opinions from certain Islamic societies are merely based on sentiment and ignorance towards the concept position of Mis-yar marriage according to Islamic law. This study aims to discuss the concept of Mis-yar marriage and its position according to Islamic Muslim. In addition, it also aims to discuss thoroughly on the perceptions of Malaysian Muslim society towards Mis-yar marriage since it has become a debatable issue in the country. As such, the research on Mis-yar marriage is conducted through the studies on the opinions of Muslim scholars and by referring to a variety of Islamic literatures written by Muslim scholars in the past and at present. Moreover , the comparison between ordinary marriage that has been commonly practiced, and Mis-yar marriage is conducted by the researcher. It is meant to reveal the concept of Mis-yar marriage whether it is in parallel with the concept and philosophy of marriage promoted in Islam as it is directed by the Holy Quran as well as taught by the Prophet Muhammad (p.b.u.h). For the purpose of understanding the perceptions of Muslim society in Malaysia towards Mis-yar marriage, a field study is also conducted by interviewing knowledgeable individuals selectively representing various Malaysian society who are enable to contribute their professional thoughts from various disciplines. From the data that has been analyzed qualitatively, it is identified that knowledge of Islamic society in Malaysia about Mis-yar marriage is inadequate. Furthermore, they pay little attention to the said matter. The findings shows that Mis-yar marriage is, in fact, an appealing concept. Therefore, it is permissible to be practiced by the married women to provide mutual assistance to other unwedded women, as well as widows by permitting their current beloved husbands to take the holy vows with them.


## PENGENALAN

### 1.0 MUQADDIMAH

Nikah mis-yar merupakan istilah yang baru di Negara ini walaupun dari segi praktiknya telah lama berlaku. Perkahwinan seperti ini masih menjadi isu perbincangan di kalangan para ulama di negara Malaysia dalam menentukan status hukum dan kesesuaiannya untuk diamalkan. Perkahwinan seperti ini juga tidak jelas berlaku di negara ini tetapi secara realitinya perkahwinan seperti ini telah lama berlaku jika kita mentakrifkan perkahwinan ini dengan maksud meletakkan tanggungjawab mencari nafkah di tangan isteri. Kajian tentang nikah mis-yar dengan mengkhususkan kepada konsep dan persepsi tokoh masyarakat Islam di Malaysia ini dibuat dengan harapan penemuannya nanti dapat menjelaskan konsep, status hukum dan penerimaannya di kalangan masyarakat di negara ini.

### 1.1 LATAR BELAKANG KAJIAN

Firman Allah S.W.T. :





Maksudnya: "Dan di antara tanda-tanda yang membuktikan kekuasaanNya dan rahmatNya, bahawa ia menciptakan untuk kamu (wahai kaum lelaki), isteri-isteri dari jenis kamu sendiri, supaya kamu bersenang hati dan hidup mesra dengannya, dan dijadikanNya di antara kamu (suami isteri) perasaan kasih sayang dan belas kasihan. Sesungguhnya yang demikian itu mengandungi keterangan-keterangan (yang menimbulkan kesedaran) bagi orang-orang yang berfikir".<sup>1</sup>

Ikatan perkahwinan merupakan perjanjian yang teguh, yang diamanahkan oleh Allah s.w.t. untuk dipelihara oleh setiap pasangan suami isteri demi mencapai kebahagiaan yang dicita-citakan di dunia dan di akhirat. Untuk menuju ke arah matlamat ini, setiap individu perlu memahami objektif, hala tuju serta tujuan perkahwinan.

Islam telah menggariskan dasar-dasar pembentukan sesebuah keluarga muslim mengikut al-Quran dan al-Sunnah. Umum mengetahui bahawa matlamat dan tujuan perkahwinan adalah demi memenuhi Sunnah Rasulullah s.a.w. di samping memenuhi tuntutan fitrah insaniah secara halal. Manusia sebagai makhluk Allah s.w.t. yang paling mulia dan istimewa yang dilantik menjadi khalifah Allah s.w.t. di muka bumi ini dari sejak mula lagi dijadikan berpasang-pasangan. Tercerna keturunan manusia dari pasangan Adam dan Hawa, dan melalui pasangan ini maka berkembang biaklah keturunan manusia di muka bumi ini sampai kiamat. Bermatlamatkan keturunan manusia yang bersih dan suci, maka Allah s.w.t. menurunkan syariat yang mengatur urusan yang bersangkutan dengan hubungan antara lelaki dan wanita itu dalam beberapa peraturan seperti melalui bab

---

<sup>1</sup> Tafsir Al-Quran Pimpinan *al-Rahmān*, Surah *Al-Rūm* ayat 21 hlm. 1059

*Munākahāt, Nizām al-Ushrah, Fiqh al-Ahwāl al-Syar'iyyah, Ahkām al-Ziwāj* dan lain-lain lagi yang mengandungi peraturan serta panduan hidup berumahtangga.

Sebagaimana Nabi Adam dan isterinya Hawa hidup bahagia sebagai suami isteri diikuti oleh anak cucunya sehingga ke hari ini, begitulah impian dan harapan setiap individu lelaki dan wanita. Apabila sampai masa untuk berpasangan, maka bermulalah pencarian teman sehidup semati. Dalam usaha mencari pasangan ideal, seideal rumahtangga Rasulullah s.a.w. dengan Siti Khadijah, ramai pula yang gagal mencari dan melaksanakan tuntutan perkahwinan itu. Sekalipun menemui pasangan yang dirasakan begitu ideal, terbit pula isu-isu selepas perkahwinan. Isu pasangan saling tidak memahami jiwa pasangan masing-masing, perlaksanaan tanggungjawab yang tidak seimbang, mandul dan berbagai konflik yang sering kedengaran di media massa membabitkan isu-isu rumahtangga membuatkan ramai di kalangan wanita merasakan adalah lebih baik menangguhkan sahaja cita-cita bersuami setelah tercapai cita-cita dalam kerjaya. Akibat dari penangguhan ini maka timbul pula fenomena di mana ramai wanita lanjut usia yang tidak bertemu jodoh.

Di Malaysia, mengikut statistik yang dikeluarkan oleh Bahagian Kependudukan, Lembaga Penduduk dan Pembangunan Keluarga Negara ( LPPKN )<sup>2</sup>, jumlah lelaki dan wanita yang tidak berkahwin dalam usia 30 tahun ke atas mencecah 753 815

---

<sup>2</sup> Dewan Masyarakat, April 2006, *Fenomena Wanita Kahwin Lewat*, hlm. 37

orang. Dari sudut jantina, statistik yang diasaskan daripada banci penduduk dan perumahan 2000 itu menunjukkan 290 730 orang daripadanya adalah wanita<sup>3</sup>.

Salah satu faktor kelewatan atau penangguhan perkahwinan ini adalah disebabkan wanita merasakan bahawa perkahwinan adalah pilihan dan bukan dikategorikan sebagai keperluan hidup. Faktor ini dengan jelas mencerminkan perubahan pemikiran wanita yang makin berasa yakin untuk meneruskan hidup tanpa lelaki.

Berikutan peningkatan jumlah wanita tidak berkahwin ini, maka Mahmood Zuhdi bin Abdul Majid<sup>4</sup>, telah mencadangkan '*nikah mis-yar*'<sup>5</sup>. Konsep yang diketengahkan ini adalah merujuk kepada amalan masyarakat Arab yang telah diamalkan sejak sekian lama.

Cadangan Mahmood Zuhdi ini adalah berdasarkan fenomena yang berlaku dalam masyarakat kini di mana terdapat begitu ramai wanita yang belum berkahwin kerana beberapa faktor antaranya mementingkan kerjaya, berpangkat serta berkedudukan tinggi dalam masyarakat sehingga sanggup menjadi andartu atau anak dara tua. Selain daripada itu perkahwinan ini juga mampu mengurangkan maksiat dan dapat menyelamatkan ramai wanita. Cadangan ini dipersetujui oleh Nik Abdul Aziz bin Nik Mat<sup>6</sup> yang juga berpendapat, *nikah mis-yar* juga dibenarkan

---

<sup>3</sup> Dewan Masyarakat. *Ibid*, hlm. 37


<sup>4</sup> Mahmood Zuhdi bin Abdul Majid adalah seorang Profesor dan Pengarah Akademi Pengajian Islam, Universiti Malaya, Kuala Lumpur.

<sup>5</sup> Penyelidik berpendapat perkataan *misyar* ditulis dengan *mis-yar* untuk mengelakkan kekeliruan sebutannya.

<sup>6</sup> YB. Datuk Nik Aziz bin Nik Mat ialah Menteri Besar Kelantan.

dan tidak bercanggah dengan hukum Islam, asalkan seseorang wanita itu bersetuju.

Beberapa persoalan yang mungkin boleh diketengahkan iaitu: apakah maksud sebenar nikah mis-yar. Adakah perkahwinan jenis ini sah dari segi hukumnya? Bagaimana pula dengan matlamat perkahwinan itu sendiri yang bermatlamatkan kewujudan sebuah masyarakat berkualiti hasil kasih sayang dan didikan daripada ketua keluarga iaitu ibu dan bapa? Bagaimana pula dengan tanggungjawab suami melalui ayat al-Quran yang berbunyi :



*Maksudnya : “Kaum lelaki itu adalah pemimpin dan pengawal yang bertanggungjawab terhadap kaum perempuan, oleh kerana Allah telah melebihkan orang-orang lelaki (dengan beberapa keistimewaan) atas orang-orang perempuan dan (juga) kerana orang lelaki telah membelanjakan memberikan nafkah) sebahagian dari harta mereka”.*

Ibnu Kathir dalam tafsirnya menyebutkan bahawa lelaki adalah pemimpin kaum wanita dalam erti pemimpin, ketua, hakim dan pendidik wanita<sup>7</sup>

Jika diteliti mafhum ayat al-Quran tersebut, ternyata matlamat perkahwinan melalui nikah mis-yar telah menyimpang dari falsafah perkahwinan dalam Islam. Persoalannya kini, mengapa pulak ulama di negara Arab mengharuskan perkahwinan ini. Pengharusan itu sudah tentu bersandarkan kepada alasan-alasan

<sup>7</sup> Ibnu Kathīr, Tafsir al-Quran al-Azīim, juz 2, hlm.20

tertentu sehingga membawa kepada tajuk perbincangan dan fatwa-fatwa melalui beberapa kitab yang diterbitkan seperti *Ahkām li al-Mar’ah al-Muslimah* oleh Syeikh ‘Atiyyah Saqr, *Fatāwā Mu’āsirah* oleh Yusoff al-Qaradāwī dan lain-lain lagi. Bagaimanapun, isu ini seperti di Negara Malaysia, juga menerima kritikan dari golongan agama<sup>8</sup>.

Dengan pelbagai pandangan yang dikemukakan, maka penyelidik terpenggil untuk cuba meneroka, mengupas, menyelidik, meminta pandangan, menyuarakan pendapat menerusi disertasi ini dengan harapan ia mampu mengubah persepsi, menjelaskan secara terperinci dengan sokongan dalil-dalil naqli dan pandangan-pandangan dari ulama serta ahli-ahli akademik, badan-badan pertubuhan yang terdapat di Malaysia khususnya yang sering mempersoalkan isu ini supaya semua orang mampu berfikir secara rasional samada nikah mis-yar ini sesuai atau tidak untuk diamalkan di Malaysia tanpa mengeneipkan sumber rujukan utama dan pertama iaitu al-Quran dan al-Hadis.

## **1.2 PENYATAAN MASALAH**

Penyelidik merasakan kajian ini adalah penting kerana apabila persoalan berkaitan agama ditimbulkan, terutama agama Islam, isu ini mendapat perhatian dan pandangan yang begitu kontroversi. Lebih-lebih lagi jika isu-isu baru yang ditimbulkan dengan tujuan mengurangkan beberapa masalah di kalangan masyarakat Islam itu sendiri. Contohnya nikah mis-yar. Tanpa kajian sepenuhnya

---

<sup>8</sup> Persoalan ini akan penyelidik jelaskan dalam bab 4 nanti.

dilakukan terlebih dahulu, terdapat ramai pihak yang ingin memberikan pandangan dan pendapat.

Penyelidik juga akan cuba mengkaji sejarah wujudnya nikah mis-yar dan adakah nikah seperti ini perlu dan sesuai diamalkan di negara ini pada era ini. Setelah meneliti beberapa pandangan dari tokoh-tokoh akademik melalui ruangan isu dalam beberapa majalah, laman-laman web dan akhbar berkaitan isu ini, penyelidik dapat merasakan bahawa isu ini dipandang berat dan sukar. Pendapat mereka itu mungkin disebabkan oleh pertama, kekurangan ilmu tentang sejarah kewujudan mis-yar. Kedua, tiada sumber asli yang boleh dirujuk setakat ini di negara kita contohnya buku atau kitab tentang mis-yar ditulis oleh tokoh-tokoh agama tempatan. Ketiga, mendapat gambaran yang kurang tepat mengenai konsep dan amalan nikah mis-yar. Keempat, pandangan mereka dipengaruhi oleh emosi dan bukan rasionaliti.

Nikah mis-yar adalah penemuan baru bagi rakyat Malaysia. Ramai orang tertanyanya apakah nikah mis-yar itu. Sementelah mengetahui bahawa nikah ini adalah nikah yang menguntungkan kaum lelaki, kaum wanita mulai bangun dan menentanginya. Manakala bagi kaum lelaki pula, jika nikah ini berlaku di kalangan wanita ahli keluarganya, sudah pasti mereka tidak bersetuju.

Percanggahan pendapat ini menjadikan nikah mis-yar ini begitu menarik untuk dibuat kajian. Ada juga yang berpendapat bahawa nikah seperti ini termasuk dalam kes-kes terpencil yang bermaksud tidak perlu diperdebatkan terlalu

terperinci kerana banyak lagi perkara lain yang boleh dikongsi dan mendatangkan faedah bersama. Namun perlu diingat bahawa, jika isu sebegini tidak diperjelaskan, akan timbul kekeliruan dari segi persepsi masyarakat bukan Islam tentang Agama Islam itu sendiri yang selama ini pun telah dilemparkan dengan pelbagai tohmahan seperti keharusan berpoligami dikatakan sebagai mengambil kesempatan ke atas wanita, umat Islam adalah pengganas dan berbagai lagi. Justeru itu, penyelidik akan cuba menghuraikan kekeliruan dan kefahaman tentang nikah mis-yar ini supaya isu ini dikaji dan diteliti terlebih dahulu sebelum amalan nikah ini diterima atau ditolak. Selain daripada itu, disertasi ini juga diharapkan dapat dijadikan setidak-tidaknya rujukan awal untuk para pengkaji dalam meneroka isu ini lebih jauh lagi.

Bertitik tolak dari sinilah penyelidik akan cuba mendapatkan maklumat yang tepat serta huraian dan penjelasan yang terbuka dari beberapa orang tokoh agama terkemuka bagi merongkai isu ini supaya dapat diterjemahkan oleh masyarakat Malaysia dalam konteks yang lebih luas dan adil.

### **1.3 BATASAN KAJIAN**

Kajian ini secara khususnya akan menyentuh mengenai perkara-perkara berikut :

- 1.3.1 Konsep nikah mis-yar dan kedudukan hukumnya dari segi Syariah Islam menurut pendapat serta pandangan ulama' Ahli Sunnah Wa al-Jamaah (ASWJ) sama ada ulama tradisional mahupun ulama semasa tanpa melihat pandangan ulama di luar dari ASWJ

1.3.2 Kajian ini akan melihat persepsi tokoh masyarakat Islam yang mewakili masyarakat umum terhadap konsep dan amalan nikah mis-yar dan kemungkinan perlaksanaannya di Malaysia.

#### **1.4 KEPENTINGAN KAJIAN**

Kajian tentang nikah mis-yar ini adalah penting kerana beberapa alasan tertentu. Pertama, kajian tentang nikah mis-yar ini belum pernah dibuat oleh mana-mana individu samada pada peringkat ijazah pertama, sarjana mahupun peringkat Ph.D. Ini adalah kerana isu ini baru sahaja diperkatakan secara langsung di negara kita. Oleh itu kajian awal ini diharapkan boleh menjadi pembuka jalan untuk menjelaskan konsep sebenar nikah mis-yar boleh mengundang pengkaji-pengkaji lain menjalankan kajian lanjut mengenai nikah mis-yar.

Kedua, kajian ini dapat membantu mengatasi masalah ramai wanita yang tidak berkahwin sehingga lanjut usia dimana perkahwinan ini lebih bersifat membantu menaikkan status golongan wanita ANDARTU kepada wanita bergelar isteri. Kemampuan golongan wanita ini dari segi kewangan tidak dinafikan tetapi mereka terlepas peluang melalui perkahwinan disebabkan banyak perkara. Antaranya ialah seperti pihak lelaki merasa tidak sesuai kerana kedudukan jawatan wanita itu lebih tinggi atau mungkin juga disebabkan wanita itu sendiri terlalu mementingkan kedudukan jawatan sehingga lupa bahawa usia mereka semakin lanjut dimana mereka sepatutnya telah berkeluarga.

Ketiga, kajian ini diharapkan juga dapat menepis tohmahan oleh pihak yang tidak ada asas pengetahuan terhadap nikah mis-yar seperti persatuan-persatuan yang kononnya prihatin terhadap persoalan wanita. Mereka tidak mengkaji tujuan dan kepentingannya kepada masyarakat khususnya yang berdepan dengan pelbagai masalah seperti gejala bersekedudukan tanpa nikah yang semakin merisaukan hari ini. Selain daripada itu, kajian ini boleh membuka minda masyarakat mengenai tujuan dan matlamat perkahwinan yang sebenarnya yang dikehendaki dalam Islam.

Keempat, melalui kajian ini dapat membuktikan secara ilmiah sejauh mana penerimaan nikah mis-yar ini kepada wanita-wanita di Malaysia khususnya pada era kini. Jika perlaksanaannya dilihat tidak sesuai, kemungkinan hanya untuk masa kini. Bagaimanapun, kemungkinan nikah ini sesuai pula dilaksanakan pada masa akan datang.

## **1.5 OBJEKTIF KAJIAN**

Kajian ini bertujuan untuk :

- 1.5.1 mengenalpasti konsep dan kedudukan hukum nikah mis-yar menurut Syariah Islam.
- 1.5.2 mengenalpasti sejauh manakah nikah mis-yar ini telah menjadi amalan masyarakat Islam di Malaysia.
- 1.5.3 mengenalpasti persepsi tokoh masyarakat Islam di Malaysia terhadap nikah mis-yar.

## 1.6 KAJIAN LEPAS

Kajian tentang persoalan perkahwinan memang banyak dikaji oleh para sarjana samada pada peringkat Sarjana mahupun Ph.D. dengan memberi tumpuan kepada beberapa persoalan dalam perkahwinan. Contohnya mengenai perceraian, nafkah, hak hadanah, wali, dan lain-lain lagi.

Contohnya, Norliza Ghazali<sup>9</sup>, menerusi judul disertasinya, *Objektif Perkahwinan: Satu Kajian Khusus Terhadap Kefahaman dan Penghayatan Islam di Kuala Lumpur*, telah menjelaskan dengan terperinci mengenai sejauh mana masyarakat Islam di Kuala Lumpur memahami tujuan dan falsafah perkahwinan dalam Islam. Beliau memilih judul ini disebabkan pemerhatian beliau terhadap budaya masyarakat di Kuala Lumpur yang sentiasa sibuk dalam kerjaya terutama ibubapa sehingga perhatian terhadap anak-anak terabai dan banyak berlaku kes perceraian. Bagaimanapun, pengkaji ini langsung tidak menyentuh apa-apa isu berkaitan nikah mis-yar.

Mengenai persoalan nafkah pula telah diutarakan oleh Nabilah Haji Abdullah<sup>10</sup>, menerusi judul disertasinya iaitu *Nafkah Isteri Dalam Perkahwinan Islam: Satu Kajian Terhadap Isteri Bekerja di Daerah Pasir Mas Kelantan*. Secara khususnya, beliau menghuraikan peranan suami dalam memberikan nafkah berbentuk material kepada isteri mereka yang juga mempunyai pendapatan sendiri samada lebih atau kurang dari pendapatan suami. Ternyata, menurut beliau, nafkah

---

<sup>9</sup> Beliau adalah pelajar Sarjana, Akademi Pengajian Islam, Universiti Malaya, 1998.

<sup>10</sup> Beliau adalah pelajar Sarjana, Jabatan Fiqh dan Usul, Akademi Pengajian Islam, Universiti Malaya, 2003.

berbentuk ini rata-rata telah diabaikan oleh suami. Sungguhpun nafkah menjadi objektif kajian pengkaji ini, beliau tidak menyentuh persoalan nikah mis-yar.

Persoalan hak isteri apabila berlaku perceraian pula contohnya, telah dikemukakan oleh Hazleena Atma A. Mohd. @ Atam<sup>11</sup>, menerusi kajiannya berjudul, *Hak Isteri Dalam Pembubaran Perkahwinan Khulu<sup>ʿ</sup> dan Ta<sup>ʿ</sup>līq: Kajian Perbandingan Antara Mazhab*. Menerusi kajian ilmiah ini, beliau telah mengkaji apakah hak yang sepatutnya diperolehi oleh si isteri apabila berlaku pembubaran perkahwinan yang bukan disebabkan oleh talak, tetapi melalui *khulu<sup>ʿ</sup>* dan *ta<sup>ʿ</sup>līk* dengan membuat perbandingan antara mazhab-mazhab seperti Mazhab Shafie, Mazhab Hanbali, Mazhab Maliki dan Mazhab Hanafi. Disertasi yang dikemukakan ini juga kelihatan jauh daripada membicarakan persoalan nikah mis-yar.

Selain persoalan harta sepencarian, nafkah, tanggungjawab suami dan seumpamanya itu yang menjadi fokus kajian para sarjana, persoalan poligami juga turut menjadi sasaran kajian yang menyentuh dari perbagai aspek seperti nafkah, tanggungjawab, keadilan, giliran dan seumpamanya. Sebagai contoh, Hazlizawati binti Hassan<sup>12</sup> melalui disertasinya berjudul *Amalan Berpoligami dan Kesannya Terhadap Pembangunan Keluarga: Satu Tinjauan di Daerah Kuala Terengganu*. Beliau telah menghuraikan kesan poligami dalam rumahtangga khusus di daerah tertentu yang mana menurutnya, kejayaan rumahtangga seperti itu bergantung sepenuhnya kepada kebijaksanaan seorang suami dalam mendidik keluarganya

---

<sup>11</sup> Beliau adalah pelajar Sarjana, Fakulti Pengajian Islam, Universiti Kebangsaan Malaysia, 2003

<sup>12</sup> Beliau adalah pelajar Sarjana, Jabatan Fiqh dan Usul, Akademi Pengajian Islam, Universiti Malaya, 2003

yang terdiri daripada anak-anak dan isteri-isteri serta keluarga semua pihak yang terlibat dengan keluarga mereka.

Mohd Zamsul bin Abdul Latif<sup>13</sup> pula, menerusi disertasinya berjudul *Konsep Kufu Dalam Perkahwinan: Kajian mengenai kefahaman dan amalan masyarakat Islam di Negeri Sembilan* membincangkan perihal kufu iaitu perkahwinan berdasarkan taraf yang sama dengan meneliti sejauh manakah kefahaman masyarakat Islam di Negeri Sembilan dalam persoalan pemilihan calon menantu. Penulis mendapati kajian ini dapat menyedarkan masyarakat Islam tentang konsep kufu yang disebutkan atau yang dimaksudkan dalam Islam. Kajian ini juga tidak menyentuh persoalan nikah mis-yar yang tidak memandang kufu itu sebagai keutamaan dalam pemilihan calon suami atau isteri.

Berdasarkan penelitian penyelidik terhadap beberapa lagi judul penyelidikan dari beberapa buah universiti utama di Malaysia, penyelidik mendapati kajian tentang nikah mis-yar telah dilakukan oleh seorang pelajar peringkat doktor falsafah dari Universiti Islam Antarabangsa Malaysia (UIAM) iaitu *Usāmah Umar Sulaimān al-Asyqar*. Beliau membincangkan isu nikah mis-yar ini dalam judul disertasinya iaitu *Mustajaddāt Fiqhiyyah Fi Qadhāyā al-Ziwāj Wa al-Talāq*. Kajian beliau merangkumi takrif, nafkah, hukum, dan sebagainya<sup>14</sup>.

---

<sup>13</sup> Beliau adalah pelajar sarjana, Jabatan Fiqh dan Usual, Akademi Pengajian Islam, Universiti Malaya, 2005

<sup>14</sup> Usamah Umar Sulaiman al-Asyqar, *Mustajaddat Fiqhiyyah Fi Qadhaya al-Ziwaj wa al-Talaq*, 2000.

Berpendukan kajian beliau itu, penulis cuba untuk mengkaji sejauh mana amalan nikah mis-yar ini berlaku dalam masyarakat Islam di Malaysia dengan melihat kepada perspektif tokoh masyarakat Islam di Malaysia. Kajian seperti ini belum pernah diteroka oleh mana-mana pengkaji sebelum ini. Ini adalah kerana isu ini merupakan isu yang baru dalam negara Malaysia walaupun dari segi praktisnya kemungkinan telah pun diamalkan oleh segelintir masyarakat Malaysia sejak sekian lama<sup>15</sup>.

Penyelidik merasakan kajian tentang nikah mis-yar ini adalah suatu kajian yang amat menarik dan setakat hari ini kajian tentang tentang nikah mis-yar secara khusus dan pengamalannya d Malaysia secara langsung belum lagi ditemui oleh penyelidik. Penyelidik berpendapat demikian kerana dalam kitab-kitab fiqh klasik umpamanya, para fuqaha' membahaskan pelbagai jenis dan bentuk perkahwinan samada yang dibenarkan atau diharamkan oleh Islam, namun tiada dalam perbahasan mereka tentang nikah mis-yar. Sehingga hari ini penyelidik juga belum menemui sebarang bentuk tulisan dalam bentuk buku oleh tokoh-tokoh agama di Malaysia.

## **1.7 METODOLOGI KAJIAN**

---

<sup>15</sup> Kenyataan penyelidik ini adalah berdasarkan pengalaman individu tertentu yang dikenali olehnya dan akan dijadikan sebagai responden pada bab 4.

Metodologi merupakan elemen terpenting dalam sesuatu kajian ilmiah kerana ini merupakan cara kerja untuk memahami objek yang menjadi sasaran penelitian<sup>16</sup>. Oleh sebab itu, setiap bidang penyelidikan mempunyai metodenya tersendiri<sup>17</sup>. Kajian ini adalah kajian kualitatif yang akan menekankan data bersumberkan data lapangan yang diperolehi daripada kajian lapangan seperti temubual (*field work*). Namun kajian ini dibantu juga dengan kajian kepustakaan (*Library Research*). Secara khususnya, data yang diperolehi terdiri daripada data sekunder dan data primer<sup>18</sup>.

#### 1.7.1 Data Primer

Tidak banyak tulisan tentang nikah mis-yar yang penyelidik temui setakat hari ini. Justeru itu, penyelidik akan menggunakan kaedah temubual dengan responden yang telah dikenal pasti terlebih dahulu dan beberapa orang tokoh agama yang memang mahir dalam bidang ini untuk mengenalpasti kedudukan nikah mis-yar dalam konteks Negara Malaysia dan amalan masyarakat di Negara Arab. Responden yang dipilih adalah berdasarkan kriteria berikut :

- a. mempunyai pengetahuan yang mendalam dan diiktiraf oleh masyarakat dalam bidang agama contohnya mufti, guru agama, kadi dan mereka yang arif dalam bidang ini.

---

<sup>16</sup> Koentjaraningrat ( 1991 ), *Metod-metod Penelitian Masyarakat* . Jakarta : Penerbit Pt Gramedia Pustaka Utama, hlm. 7

<sup>17</sup> Mahayudin Haji Yahaya ( 1994 ), *Naskah Jawi Sejarah Dan Teks Jilid 1*. Kuala Lumpur : Dewan Bahasa dan Pustaka.

<sup>18</sup> Syed Arabi Idid ( 1992 ), *Kaedah Penyelidikan Komunikasi Dan Sains Sosial*, Kuala Lumpur : DBP, hlm. 33. Data primer atau data utama ialah sumber-sumber yang ada kaitan secara langsung dengan kajian ini seperti temubual, soal selidik dan seumpamanya. Data sekunder ialah yang diambil daripada sumber selain data utama.

- b. berpengalaman dalam perkahwinan seumpama ini
- c. wakil-wakil pertubuhan atau badan-badan bukan kerajaan (NGO) tertentu
- d. ahli-ahli akademik

Pengumpulan data secara penyzoalan mempunyai bebarapa cara. Penyelidik boleh menyoal responden secara lisan dan bersemuka dengan mereka yang disebut temubual. Penyelidik juga akan mengemukakan soalan secara bertulis jika perlu yang akan diisi oleh responden dan ini disebut sebagai soal selidik<sup>19</sup>.

Data primer juga akan diperolehi melalui kajian terhadap kitab yang berkenaan yang ditulis oleh para ulama silam yang bersumberkan daripada al-Quran dan al-Hadis.

#### 1.7.2 Data Sekunder

Selain data primer, penyelidik juga menggunakan data sekunder dengan merujuk kepada tulisan daripada sarjana dan juga penulis lain samada dari dalam dan juga luar negeri untuk menyokong kajian ini. Melalui data sekunder ini juga penyelidik akan mendapatkan maklumat melalui internet yang berkaitan persoalan perkahwinan dan nikah mis-yar.

---

<sup>19</sup> Sulaiman Masri ( 2003 ), *Kaedah Penyelidikan Dan Panduan Penulisan ( Esei, Proposal, Tesis)*, Kuala Lumpur : Utusan Publications & Distributors Snd Bhd, hlm. 62

Terdapat lima data sekunder dalam kajian ini iaitu buku-buku berkaitan nikah samada nikah biasa (*urfi*) atau nikah mis-yar tulisan tokoh-tokoh agama tempatan dan luar negeri, melalui akhbar, majalah, internet, rekod-rekod berkaitan dari Mahkamah Syariah dan Sivil serta Enakmen Undang-undang Keluarga Islam dari beberapa buah negeri.

Penyelidik hanya meneliti tiga enakmen dari tiga buah negeri sahaja iaitu Enakmen Keluarga Dan Mal Islam Negeri Kedah, Enakmen Undang-undang Keluarga Islam Pulau Pinang dan Enakmen Pentadbiran undang-undang Keluarga Islam Perlis kerana hampir semua enakmen di Malaysia mempunyai peruntukan yang hampir sama secara umumnya.

Secara keseluruhannya, kajian ini boleh diklasifikasikan sebagai kombinasi antara kajian kepustakaan dan kajian lapangan.



## FALSAFAH DAN HUKUM HAKAM PERKAHWINAN DALAM ISLAM

### 2.0 Pendahuluan

Institusi perkahwinan merupakan satu medium pengabdian kepada Allah s.w.t. yang disusun rapi oleh Syariat Islam demi memenuhi keperluan fitrah manusia dengan penuh hikmah dan kebijaksanaan. Medium perkahwinan atau pernikahan yang disusun oleh Islam melampaui pandangan mata kasar manusia dalam apa sahaja aspek kehidupan. Keberkatan, perekonomian, taraf insan, mendidik menjadi *murobbi*, silaturrahim bahkan penyebaran zuriat manusia ternyata telah membuatkan institusi ini mempunyai peranan yang amat penting dalam menjana satu tamadun umat ke arah kehidupan yang diredhai oleh Allah s.w.t. Pada bab 2 ini, penyelidik akan mengupas secara langsung falsafah perkahwinan dalam Islam yang merangkumi semua perkara yang berkaitan perkahwinan iaitu takrif, tujuan dan matlamat, syarat-syarat, jenis-jenis perkahwinan yang diharuskan dan yang diharamkan, hukum-hukum perkahwinan, bentuk-bentuk pemberian yang wajib diberikan oleh suami, tanggungjawab atau peranan suami dan isteri serta peranan institusi perkahwinan dalam Islam. Tujuannya adalah supaya penyelidik dapat meletakkan suatu landasan yang berfungsi bagi menganalisis pernikahan masyarakat yang menjadi objektif utama kajian ini.

## 2.1 TAKRIF NIKAH

Perkahwinan atau nikah menurut bahasa ialah berkumpul dan bercampur. Menurut istilah syarak pula, nikah membawa maksud *ijab qabul* (akad) yang menghalalkan persetubuhan antara lelaki dan perempuan yang diucapkan dengan kata-kata yang menunjukkan nikah menurut peraturan yang ditentukan oleh Islam<sup>1</sup>.

Menurut Zakariyyā al-Ansāri, nikah ialah akad yang membolehkan seorang lelaki bergaul bebas dengan seorang wanita tertentu, dan pada masa akad menggunakan lafaz nikah atau *tazwīj* atau terjemahannya<sup>2</sup>

"عقد يتضمن اباحة وطء بلفظ انكاح أو نحوه"

Ibnu Qudamah pula dalam kitabnya *al-Mughnī* mentakrifkan *ijab* dan *qabūl* iaitu satu akad yang mengandungi makna mengharuskan persetubuhan dengan lafaz nikah atau seumpamanya<sup>3</sup>.

Berdasarkan takrif tersebut, penyelidik mendapati perkahwinan atau pernikahan adalah satu akad atau perjanjian yang merangkumi dan mencakupi perhubungan dua individu lelaki dan wanita bergaul secara halal mengikut syarak dan kebenaran bagi mereka untuk berseronok atau bermesra melampaui apa yang tidak dibenarkan oleh syarak sebelum berlakunya akad. Nikah atau kahwin juga membawa maksud menghimpunkan dua orang yang

---

<sup>1</sup>Zaleha Kamarudin, *Kamus Istilah Undang-undang Keluarga Islam*, hlm. 112

<sup>2</sup> Abu Yahya Zakariyya al-Ansari, *Fath al-Wahhab*, hlm.2

<sup>3</sup> *Ibnu Qudāmah, al-Mughnī*, hlm.3

berlainan jantina dalam satu ikatan yang dinamakan perkahwinan atau pernikahan. Masyarakat Arab menggunakan kalimah nikah yang membawa maksud akad dan juga membawa maksud persetujuan serta berseronok-seronok<sup>4</sup>.

Ibn Kathir dalam tafsirnya menerangkan bahawa nikah bermaksud akad semata-mata<sup>5</sup>. Ia bererti nikah itu tidak membawa maksud wajib bersetubuh. Sebaliknya nikah hanyalah satu medium untuk menghalalkan persetujuan sahaja. Sebab itulah dalam ayat ini menyebut bahawa; jika perceraian berlaku sebelum berlaku jima<sup>c</sup>, si suami harus memberikan *mut'ah*<sup>6</sup> kepada isterinya dan dalam hal ini tiada iddah bagi isteri tersebut untuk dituntut oleh si suami kecuali bagi isteri yang kematian suami sebelum sempat digauli, iddahnyanya

---

<sup>4</sup> Abdul Khairi al-Latifi, *Fiqh Perkahwinan Menurut Mazhab Imam as-Syāfi'e*, hlm. 32

<sup>5</sup> *Ibn Kathir, Tafsir al-Quran al-'Azim*, Juz 3 hlm. 505


<sup>6</sup> Zaleha Kamarudin, *Kamus Istilah Undang-undang Keluarga Islam*, hlm. 104. *Mut'ah ialah hadiah atau bayaran saguhati yang diwajibkan ke atas suami kepada isterinya yang telah diceraikan sebelum bersetubuh pada aqad yang tidak menyebut mas kahwin. Ini adalah pemberian yang diwajibkan oleh hukum Syara' kerana perceraian yang bukan disebabkan oleh isteri kerana 'aib yang ada pada dirinya atau fasakh dari isteri kerana 'aib yang ada pada diri suami. Ia diwajibkan bukan sahaja apabila suami mentalaqkan isterinya, tetapi juga apabila isteri menebus talaq dari suaminya. Menurut pendapat Mazhab Syafi'i pula, mut'ah itu wajib diberikan kepada isterinya sama ada ia diceraikan sebelum dicampuri atau sudah dicampuri dengan syarat bahawa perceraian itu berlaku dengan kehendak suami. Di dalam al-Quran terdapat beberapa ayat yang menunjukkan wajibnya mut'ah itu iaitu dalam surah al-Baqarah ayat 236 dan 241 dan surah al-Ahzab ayat 49. Pensyariatan mut'ah ini mempunyai hikmah yang tersendiri. Pemberian mut'ah selepas sesuatu perceraian dapat mengelakkan sebarang umpatan atau kata-kata yang kurang baik terhadap suami kerana pemberian tersebut menunjukkan kebaikan suami kerana tidak membiarkan bekas isterinya terbiar sesudah bercerai dan untuk mengelakkan bekas isterinya daripada membebakan orang tuanya selagi dia tinggal dengan mereka. Disamping itu, pemberian mut'ah juga dapat menutup rasa malu yang dialami oleh isteri dan menghindarkan fitnah serta sebagai asas untuk memulakan hidup secara bersendirian. Tentang kadar mut'ah, ia adalah berdasarkan keredaan kedua belah pihak tetapi jika tidak tercapai persetujuan, maka penentuan kadar mut'ah akan dibuat oleh kadi. Hukum syarak telah menggariskan panduan bahawa penentuan kadar mut'ah hendaklah dilihat dari segi kedudukan kaya miskinnya suami dan sifat serta keadaan isteri. Sifat ialah perwatakan, manakala keadaan ialah kedudukan keluarga atau status keluarga dalam masyarakat. Kaya dan miskin pula ialah nilai semasa dari segi perolehan dan pemilikan. Dari segi perlaksanaan undang-undang pula, perkara yang berkaitan dengan mut'ah telah diperuntukan dalam Enakmen-enakmen atau Akta Undang-undang Keluarga Islam (Wilayah-wilayah Persekutuan) 1984, Seksyen 56 telah memperuntukan bahawa seseorang perempuan yang telah diceraikan tanpa sebab yang patut oleh suaminya boleh memohon mut'ah atau pemberian saguhati kepada Mahkamah.*

adalah empat bulan sepuluh hari juga sebagaimana yang termaktub di dalam al-Quran.<sup>7</sup>

Nikah juga membawa maksud akad yang padanya terdapat *sighah* iaitu lafaz *tjab* dan *qabūl* yang berlaku di antara pihak lelaki (suami) dan pihak perempuan (isteri) yang diwakili oleh walinya. Nikah membawa maksud dan tujuannya tersendiri iaitu dihalalkan kepada pasangan lelaki dan wanita yang mana dalam hati mereka sudah terdetik satu perasaan yang cenderung untuk melakukan hubungan seksual. Justeru itu, nikah adalah jalan keluar yang penuh hikmah sebagai satu kaedah bagi memenuhi tuntutan dan runtunan keinginan tersebut. Pernikahan itu juga akan mencernakan pelbagai impak positif bukan hanya kepada pasangan suami isteri, malahan kepada kedua-dua belah keluarga serta kesan jangka panjang kepada masyarakat, agama dan negara.

## 2.2 Falsafah Perkahwinan Dalam Islam

Perkahwinan merupakan satu ikatan yang suci dan pelengkap kepada sebuah kehidupan bagi setiap manusia. Perkahwinan bertujuan untuk menggalakkan perhubungan antara lelaki dan perempuan dalam menghalalkan perhubungan jenis yang menjadi tuntutan naluri dalam kehidupan setiap manusia yang normal. Di samping itu, perkahwinan juga dapat melahirkan zuriat serta keturunan yang diiktiraf oleh masyarakat sekelilingnya. Firman Allah s.w.t;



<sup>7</sup> Ibn Kathir, *Ibid*, hlm. 506



Maksudnya : *Dan Allah menjadikan bagi kamu dari diri kamu sendiri pasangan-pasangan (isteri), dan dijadikan bagi kamu dari pasangan kamu: anak-anak dan cucu-cicit, serta dikurniakan kepada kamu dari benda yang baik ; maka patutkah mereka (yang ingkar itu) percaya kepada perkara yang salah (penyembahan berhala), dan mereka kufur pula akan nikmat Allah?*

Berdasarkan ayat di atas, *Ibn Kathīr*<sup>9</sup> dalam tafsirnya menjelaskan bahawa Allah s.w.t. menganugerahkan nikmat kepada hambanya iaitu dengan menjadikan kepada kaum lelaki, isteri-isteri yang kejadiannya adalah dari jenis dan sebahagian dari tubuh badan mereka sendiri<sup>10</sup>. Allah s.w.t. tidak menjadikan kaum wanita dari jenis-jenis lain menunjukkan bahawa keagungan ciptaan Allah s.w.t. ini membawa kepada jaminan keserasian dan akan terbit keharmonian serta terpancar kasih sayang di dalam hati mereka iaitu kaum lelaki yang bergelar suami.

Kasih sayang itu juga akan sentiasa berkembang dari sehari ke sehari apatah lagi dengan kewujudan anak-anak serta zuriat keturunan setiap pasangan suami isteri hasil dari perkahwinan itu.

Rahmat Allah s.w.t. kepada hamba-hambanya yang bernama manusia ini amat besar dan tersembunyi pelbagai rahsia. Peraturan dan ketentuan Allah s.w.t. ini dengan hikmah dan kebaikannya jelas menunjukkan bahawa manusia dijadikan

---

<sup>8</sup> Surah al-Nahl Ayat 72

<sup>9</sup> *Ibnu Kathīr*, nama sebenarnya ialah al-*Imām al-Hafīz 'Imāduddīn Abu Fidā Ismā'il bin Kathīr*. Seorang mufassir yang telah banyak melakukan kajian tafsir dengan sangat teliti dengan dilengkapi hadis-hadis dan riwayat-riwayat yang masyhur. Ketelitian dan penjagaan piawainya dalam menafsirkan ayat-ayat al-Quran menjadikan kitab tafsirnya itu sebagai rujukan dan kajian di hampir semua majlis kajian tafsir di seluruh dunia Islam.

<sup>10</sup> *Ibn Kathīr*, *al-Quran al-Āzīm Tafsir*, Jilid 2, hlm. 599


berpasangan adalah untuk memenuhi kehendak semula jadi naluri manusia itu sendiri disamping melahirkan keturunan yang boleh beribadah kepada Allah s.w.t. dan menegakkan keimanan serta syiar Islam dan kemakmuran sejagat. Justeru itu, umat Islam perlu memahami konsep perkahwinan dalam ertikata yang sebenarnya.

### **2.3 TUJUAN DAN HIKMAH PERKAHWINAN**

Allah s.w.t. menciptakan segala isi bumi ini dengan hikmah dan maksud tersirat. Kebijaksanaan Maha Pencipta ini terbukti dengan kewujudan pelbagai ciptaan yang saling berkait dan memerlukan di antara satu sama lain. Contohnya penciptaan tumbuhan sebagai sumber oksigen kepada haiwan dan manusia, megahnya gunung dan bukit sebagai pasak bumi untuk perlindungan dan seribu satu macam faedahnya, lautan luas terbentang saujana mata memandang dan pelbagai ciptaan lagi adalah untuk dimakmurkan oleh manusia dan zuriat keturunannya. Pembangunan dan kemajuan dunia ini terserah kepada manusia. Manusia membiak melalui hubungan yang Allah s.w.t. syariatkan iaitu perkahwinan yang akan terus mewarisi khazanah alam ini. Oleh itu, Allah s.w.t. telah memperuntukan perkahwinan sebagai satu medium untuk mempercambahkan zuriat menjadi generasi penerus kehidupan ini supaya manusia dapat mengatur kehidupan serta menjalinkan tali persaudaraan yang berdasarkan kepada kasih sayang antara lelaki dan wanita.

Islam memandang perkahwinan tidak semata-mata sebagai cara untuk menyatukan lelaki dan wanita atau sebagai jalan memuaskan tuntutan hawa nafsu atau sekadar menghubungkan tali silaturrahim atau sebagai medium

dakwah. Islam memandang lebih jauh daripada itu iaitu menjadikan manusia ciptaan Allah s.w.t. ini hidup dalam suasana harmoni sepanjang kehidupan mereka sebagaimana firman Allah s.w.t :



Maksudnya : *Dan di antara tanda-tanda yang membuktikan kekuasaanNya dan rahmatNya, bahawa ia menciptakan untuk kamu (wahai kaum lelaki), isteri-isteri dari jenis kamu sendiri, supaya kamu bersenang hati dan hidup mesra dengannya, dan dijadikannya di antara kamu (suami isteri) perasaan kasih sayang dan belas kasihan. Sesungguhnya yang demikian itu mengandungi keterangan-keterangan (yang menimbulkan kesedaran) bagi orang-orang yang berfikir.*

*Ibn Kathīr* menjelaskan menerusi tafsirnya bahawa Allah s.w.t. telah menjadikan pasangan-pasangan dari kalangan suami dan isteri itu dengan tujuan supaya akan wujud rasa tenteram dan kasih sayang yang kukuh dan padu sehingga akan lahir anak-anak dan zuriat yang menjadi kelangsungan kepada sebuah kehidupan<sup>12</sup>.

Maksud ketenteraman pada mafhum ayat itu bukanlah ketenteraman nafsu syahwat semata-mata, sebaliknya membawa maksud kekosongan yang harus diisi, sebagai kekurangan yang harus dilengkapi dan sebagai kehendak dan rasa kesunyian yang perlu diatasi supaya tercapai semua kehendak sehingga diri seseorang individu itu merasa tenang, lega dan bahagia<sup>13</sup>.

<sup>11</sup> Surah *al-Rūm* Ayat 21  
<sup>12</sup> *Ibnu Kathīr, Tafsīr al-Quran al-‘Āzīm r*, Jilid 3, hlm. 439  
<sup>13</sup> Muhammad Ali Quthb, *Mutiara Perkahwinan Menurut Ajaran Islam*, hlm. 66